

西湖遊覽志第十七卷

錢塘 田汝成 輯撰

會稽 商維濬 重訂

南山分脉城內勝蹟

道院

宗陽宮龍翔宮靈順宮佑聖觀景隆觀玄同觀紫瓊觀
宗陽宮本宋德壽宮後圃也去吳山東北五百步新
宮橋之東三聖廟橋之左先是紹興間望風者言
其地有鬱葱之祥遂建德壽宮高宗禪位後居之
咸淳四年以後圃築道宮曰宗陽祀感生帝每遇

西湖志

卷之十七

一

孟享車駕嘗臨幸焉有無極順福毓瑞申佑景緯
等殿玉籟藥簡等樓大範觀化觀妙等堂會真澄
妙常淨等齋舟丘玄圃等亭皆揭以奎藻闢圃鑿
池花卉森茂元初燬延祐間真人杜道堅重建築
老君臺肖老聃像于中旁列尹喜辛餅庚桑楚南
榮趯尹文子士成琦崔瞿栢矩列禦寇莊周趙子
昂爲之記元季燬洪武間葉月庵永樂丙申周道
淵宣德癸丑沈復玠弘治元年沈復純相繼重修
內有老君臺得月樓○杜道堅號南谷當塗人風
度清雅嘗以中秋集儒彥登老君臺玩月分韻賦

詩楊仲弘爲絕倡其詩云老君臺上涼如水臥眉
水輪轉二更大地山河微有影九天風露寂無聲
龍蛇並起承金榜鸞鳳雙飛載玉笙不信弱流三
萬里此身今夕到蓬瀛

龍翔宮在清湖橋先是理宗既卽位詔以沂邸爲
龍翔宮以祀感生帝宮在後市街其傍別作南真
館以棲道流錫田千頃元至元間胡僧楊璉真伽
較轆道流改宮爲壽寧寺住持胡元洪力爭于朝
僅得田土一半而宇不可復得矣乃改建今所卽
故宋楊和王宅第後奉神祠也齋居十有曰履和

西湖志

卷之十七

二

順正全真宜休觀妙東明環隱中和守正安晚中
門曰昭符鐘樓曰和應藏殿曰琅函寶藏規制宏
麗視舊益加元統間燬住持史景仁重建楊維禎
葉廣居爲之記方丈後疊石鑿池蒔藝卉木婆娑
蒼鬱象海中僊島號小蓬山陳旅爲之記元末張
士誠占爲軍噐局國初住持毛繼祖請於朝復
之今爲叢林內有魚樂軒○楊維禎碑銘云二馬
渡江一馬瀧東觀邸闢森□張穆將祀予感生皇
疾以燁怒靈威昂十一景緯生寒芒天人南下南
斗傍朝與龍飛暮龍翔翠蓬三度黃塵揚靈宮突

立天中央湖眉海眼東西望地柱不傾天乳長黃
髯僊伯古冠裳龍腦寶藏聲琅琅上清淨掃赤尾
箚六龍在天天下昌山君海孤紛來王南極上壽
日重光○桂衡魚樂軒詩疎簾清簟卷瀟湘讀到
南華第幾章活水遶門春潑潑游鱗吹浪暖洋洋
朱紅欄檻通方沼紺碧桃花出矮墻遲日沙波牽
細苻微風磐石掃垂楊屢分早飯烏麻熟曾醉春
醪白朮香異日鯤鯨終變化當年鷄犬亦騰驤天
寒翡翠毛衣薄月出珊瑚樹影長莊子濠間從看
去琴高海上許騎將梅邊洲渚渾清淺鴈後蒹葭

西湖志

卷之十七

三

愈老蒼一曲棹歌聲欸乃三生漁父夢滄浪積來
皓雪深爲洞留住朝雲巧作房王母蟠桃依舊好
麻姑麟脯至今藏時迎賀客皆英彥日課詩書敢
怠荒別有功名期令子臥冰無用學王祥

靈順宮在板兒巷旱河頭舊名寶山院宋嘉泰間建
丞相鄭清之修 皇明正統間真人張澹然扁名
靈順

佑聖觀在興禮坊內宋孝宗潛邸也光宗寧宗皆誕
于此淳熙三年改爲老氏之宮以奉北極佑聖真
君時趙粹中爲吏部侍郎夢有客謁之着羽衣長

七尺視其刺曰北方鎮天真武靈應真君粹中奉神素謹趨下迎揖不敢執主禮神固請粹中東向坐曰侍郎今日之事子爲政矣粹中局蹐而寤明日得旨爲奉安聖像使紹定間賜額曰佑聖宮命學士院書之篆書佑字傍無人字道流叟然曰宮無人何以自立事聞上特許加人字孝宗嘗題杜甫詩于壁云富貴必從勤苦得男兒須讀五車書理宗又書全篇于東宮廳之屏元大德七年燬踰年重建改爲佑聖觀基甚宏敞今錢塘學舍皆其地也元李兵火此觀獨存 皇明洪武十五年置

道紀司于觀中元時有道士王景周者開東閣以居卽今錢唐公館是也蘇伯衡爲之記畧云王景周居佑聖觀之西廡居之東有地二畝而羸剪荒剔翳以爲圃修竹數百竿夷其中可列坐風月之夕或觴或奕無適不冝曰洗竹亭亭之右隱阜絙起有樹鬱然則七葉木也曰七葉坡由坡而西有屋兩楹中度髹几琅函森列曰禮經筵筵后重屋朱薨碧瓦翔于物表白雲依簷君思親之不可見則泫然出涕曰夢雲樓樓之下簷之外深榭翬飛護以欄楯傍植葡萄蔓延其上彌布四阿清風自

生日影不下曰清暑簷簷之外黃精蒼耳白朮紅藥椒蘭芎正杞菊之屬雜然並時秩若布掛曰種藥畦中畔築園基而墁以甃一鶴樓息其上甚馴曰馭鶴臺其傍有石虎蹲可踞而吹笙曰吹笙石石側冬青十數枝環立若相峙而高皆數丈蒼翠掩映下甃小逕曰承青逕逕南出直小園有井焉甘冽異常得開元宮浴鵠池八稜石欄置其上曰天一泉就而洗藥郁烈西達好事者比之神漢曰洗藥井○石欄上刻虞伯生天一泉銘蓋開元宮故物也銘云大荒南陲元氣積陰閔闔扉陽洞闢

曲穴流象保靈宅任君來餌黃赤石天一名錫天元册曲阿受養良有擇構官方嚴自王伯清蹕臨止靈響格虛林森奕化赫奕福鄉帝子發甘液不食何年喪遺甃白雲映空玉清客開元全盛煩百役持節旁午文纁辟爾來蕭條世代隔石磴刻文未漫畫誰其啟之規古昔句曲外史美冠舄研書千卷視貞白天真景隨玄系繹金室玉堂萬無數景隆觀在保民坊板兒巷宋嘉定十四年詔以舊脩內司改建名通玄庵在新門外寧宗書景命萬年閣元末築城移入城內尋燬于兵成化八年史志

中重建

玄同觀在癸辛街元至元開都道錄郎如山建大德
間賜額尋燬 皇明宣德三年道士殷大宗重內
有瞰碧園清麗可賞

紫瓊觀在鹽橋南荷池上元延佑間真人吳全節建
長春□□真庵純陽庵玉陽庵奉真院玄真院洞玄院
崇善院顯真院洞真院真濟院上真院白馬廟華光廟
五顯廟廣福祖廟舊城隍廟

長春庵在相安巷元延祐間有姚真人者錢唐人家
業溫飽其妻蔡氏一旦語其夫云欲脫俗脩真以

西湖志

卷之十七

六

家業二分畀夫取妾爲成家之計自以其一建庵
爲脩養之需夫曰汝旣修真吾無子女何忍獨墮
俗緣耶蔡氏然之乃曰脩真不宜夫婦同處與夫
各建一庵于西橋下夫庵在妙心寺北曰長生妻
庵在洪福橋西曰長春夫妻皆證道妙時謂之雙
脩云蔡氏號冲静弘治十一年賜真武像玉樞經
于庵內楊廉夫詩云夜坐清都鶴夢長碧天如水
日蒼蒼雲和有藥降王母霹靂無車喚阿香雪泛
玉甌茶吐味花零金鼎獨生光仙風不動庭前竹
又送微鍾到下方趙子昂詩云流水橋西一徑斜

青衣相接到僊家香分橄欖燒銀葉酒瀉松脂溢
紫霞綠竹滿堦初解籜碧桃幾樹正開花何時脫
却塵凡累來叩丹房九轉砂聶大年詩云蘂宮琪
樹罷棲鸞空有玄都大古壇野老不尋餐玉訣山
人自製切雲冠杖龍化去秋池涸笙鶴歸來夜月
寒前度劉郎偏好事種桃留與後人看

凝真庵在忠清里內元至元庚子杭州大疫里人馬
均禮延紫陽庵道士姚懶朴作法治之境内以安
里人共購地結庵以奉懶朴洪武十八年徐道真
等正統二年蕭自然等成化十年屠宗善等相繼

西湖志

卷之十七

七

重脩

純陽庵在忠清里小巷元至正間建特進神僊重玄
子書弘治三年道士姚德恂重脩

玉陽庵在馬市巷

奉真院在下馬坡巷洪武十六年道士李道椿建有
巢聖樓景泰初燬重建

玄真院在雙茶坊巷內元至正間建尋燬洪武二十
九年重建有來翠樓方井丈餘雖旱不竭

洞玄院在惠民坊北元延祐間建

崇善院在淳祐橋側元延祐間建

顯真院在慶春門內

洞真院在褚家塘宋紹興間建

真濟院在梅東橋東宋紹興二年建

上真院在裝駕橋西南宋建炎三年郡人
■捨宅
建

白馬廟在七寶山之東麓宋建炎間以祀磁州崔府
君者詳見顯應觀

華光廟在普濟橋上本名寶山院宋嘉泰間建紹興
初丞相鄭清之重脩以奉五顯之神亦曰五通五
聖江以南無不奉之而杭州尤盛莫詳本始搜神

西湖志

卷之十七

八

記所載妄誕不經而宋朝會要亦不詳載姓名或
曰五顯五行之佐也而五通非五顯也宋政和元
年詔毀五通淫祠則五通非五顯明矣豐樂橋上
亦有華光廟

五顯廟在里仁坊內元元統二年建元末燬 國初
王瑞雲重建正統中吳玄理趙道純復拓大之又
燬郭廷輔重脩五顯者五行之佐也無姓氏可考
宋時賜號一曰顯聰昭聖孚仁福善王二曰顯明
昭聖孚義福順王三曰顯正昭聖孚智福應王四
曰顯直昭聖孚愛福惠王五曰顯德昭聖孚信福

慶王五王封號皆有顯字故謂之五顯廟云

廣福祖廟在鹽橋東南卽蔣七郎家祠也每歲六月九日郡人以神誕日奉香火

舊城隍廟在羊市宋紹興元年建以祈蠶穀國朝永樂末年憲使周公以直道被法後爲杭州城隍神數見盼嚮杭民因奉其主爲新城隍而改奉舊主於此爲舊城隍廟

西湖遊覽志第十七卷終

西湖志

卷之十七

九